

海
虞
詩
話

海虞詩話卷十二

單學傳師白輯

曾大令豫謙字雲舫嘉慶六年舉人大挑分發直隸歷知南和
元城昌黎盧龍諸縣廉以律己慈以得民去任時士紳贈序有
云綠野張筵惜鄧侯之既去黃堂開府望定國之重來人傳誦
之相國松筠嘗入其境聞輿情悅懌手書毋自欺及中正字贈
之君因以毋自欺名齋題胡見山畫云羣峯颯欲秋高閣敞清
幽絕壑開三面飛泉響四周憑欄添遠思扶杖有同儔卽此寄
閒逸翛然遺世憂集坡翁句題伊墨卿先生秋水園圖云千古
風流賀季真凜然高節照時人青山有約常當戶秋水爲文不

受塵庭下已生書帶草囊中收得武陵春清詩爲洗心源濁昨

夜東風入律新

自註時先生以
咏梅近作見示

又如泉聲連壑動山色入雲深

風響晴天雨寒生夏夜霜皆烹鍊入妙

孫庶常原湘字子瀟號心青乾隆六十年第二名舉人嘉慶十
年第二名進士選庶吉士竟歸不出才品清逸詩宗太白而小
倉山房素脩堂則其所發源也已刻行天真閣集摘錄以見一
斑苦熱云陽烏西行戰火龍兩翅扇燄排當空五岳蓮華翠乾
死海水欲沸龍鼉宮我家一椽大如斗坐若深甌添柴烘有木
皆焦手可炙有席自暖身難容攤書祇覺花眩眼搗管已苦珠
流胸安得卻暑如意犀虛堂白晝生清風卻憶田家更辛苦踏

車男婦溝西東堅土不動犁不鬆兩股欲折腰如弓我讀書彼
務農勞逸靜躁迥不同讀書尚可掩卷坐農事輟作田無功人
生不幸爲耕傭一日之情終歲窮君不見城中富家翁瓜浮碧
盃酒泛鍾九月十月交初冬開倉積米高如墉欲將辛苦告富
翁富翁堂中縣官告諭如虹紅賦苦熱而及農家說到冬日所
苦用意之妙真士衡所謂游魚銜鈎出重淵之深飛鳥攬繳墜
層雲之峻矣長相思云一日不相見相思比日月兩日不相見
日月空出沒三朝又三暮胸結相思核相思樹樹樹
花開雙萼附相思樹結相思果顆顆中間兩人裹世人食果核
棄遺此中甘苦誰得知思君迢迢終復始核又生花花又子思

入風雲變態出以蛟龍盤曲之勢賀監見之亦當有泣鬼神之歎而黃金只有春難買青史誰云賤可傳一聯尤痛快

吳司馬峻基字阜伯一字邁堂號古然少藉聲華性豪逸而有檢制構壺隱園於西城位置亭池花卉具有藻思其巍然聳峙者爲三層樓顏曰大好湖山登之可拓眼界第二層則貯書處也行楷纖媚詩亦如之錄其少作二首春雨初霽次韻酬臈齋云夜雨初晴動遠思梅花先吐隔牆枝頻題碧草江淹管欲寫青山李賀詩簾外鳥嘯春夢醒樓中人起曉寒知清吟原是空閒事莫把空閒誤少時天涯離別最相思欲寄江南柳一枝淺水浮鷗了無意暖風嘯鳥又催詩細茸庭草有新色輕淡嶺雲

如故知拌得閒心能自解未曾腸斷少年時遊西子湖留滯月
餘歸作柳枝詞數章末云并州翦子裁雲手能翦風前一縷絲
有好樂無荒之義焉

董文學錫光初名金和字杏山與予同游泮又同庚老而好學
詩文必以見質予贈詩有君真智過軀之謔以其身短也有詠
雪詩十八首郊鐵蘭謂讀之使人內熱都化埽雪云妍媸藉地
空中沒黑白隨時手下分聽雪云眼底有痕將沒脛耳邊無點
不清心

黃孝廉瑞號留村嘉慶六年舉人詩尙兀冪雜詩云有松鬱澗
底有柏蟠巖陞山中凌霄草欣欣縈繞之雨露息圃豔雪霜貞

秀姿任重獨愉快歲寒不改移我有君子交如水淡攸宜寂寞
寒人子道義素所持置鐵洪鑪中火熾鐵如糜置石承雷下滴
久石離奇惟有鐵石心堅於鐵石資百年易銷歇千載以爲期
餘篇多類是染指可知鼎味也有集四卷已刊

龔學博榮字執信號杏村葦江文學子也嘉慶十二年舉人仕
溧水訓導初居四萬塘後徙邑南郭王家營步張秋河韻云十
年書劍在袁浦此重過細雨遲征騎長風憶渡河酒添詩骨健
夢到故園多計日長安近看花路幾何臨城曉發和江樹叔韻
云促裝纔聽鼓三更野店寒衾夢不成騾背霜濃車鐸咽樹頭
風勁酒旗鳴漫期努力追同輩怕作閒身負此生屈指帝城雙

闕近一隄曉日問前程仿鄧翊廷徧贈計偕同人卽次原韻云

弱冠英多氣自華錦車佳什麗江霞謂錢玉書人來漢殿真如柳張秋

河家本濂溪合愛花調周茂堂及發三口吃雙聲心是慧鄧翊才欽三

捷賦爭誇江樹叔嘉魚文字仁山學不數封侯並霍家金硯香君少

得輭腳病而有不羈之才詩不恆作作則清辭麗句專門名家
不遠過也

歸文學肇行號訪齋中年喪偶慘愴不勝未二年亦卒遺悼亡
詩成卷有云顧影淒然只自憐欲將心事向誰傳幾回看到窗
前月一樣如儂不得圓夢不逢卿更憶卿人皆道我太多情難
忘頻歲經營苦惆悵仍無一事成嗟卿訣別暗傷神哀感何由

得自伸我比他人倍惆悵眼前兒女累慈親當時有比之荀奉倩者然過情由於驟亡良助未能自廣耳予亦略同斯况錄此惘然

趙明經允恭字蓉湄生於閩閩常處謬臺壯志未伸詩多抑鬱如人情冷暖貧方覺藥性溫涼病始知壯志每因鹽米誤庸才多被利名牽甯希狗監稱辭賦每笑牛衣泣困窮交情舉世皆張耳古誼何人似季心其憤嫉深矣

趙明經元愷字叔才號退菴建義莊贈族家有園池之勝好酒愛客秋懷云西風吹敗葉颯颯下霜林叢竹斂寒色空庭生夕陰雄心孤劍在苦韻亂蛩吟豈獨悲搖落秋來自不禁秦淮臥

病云檀板金箏碧玉簫無端孤負可憐宵客中飢渴魚綠木夢
裏鶯花鹿覆蕉好友似雲遲未至病魔如霧苦難消板橋煙雨
青溪月若箇從頭問六朝書朱某客遊草云樂府愁歌行路難
江淮寄食客衣單模糊君剩翻衡刺偃蹇誰憐范叔寒名士文
章多感慨旅人情味雜悲歡登樓賦罷神傷未好向秋風刷羽
翰又偕周鶴儕探梅云我輩故應寒徹骨此花惟許月傳神然
此皆少作中年後不恆作作亦不示人予雖與交未得見也嘗
北遊不遇而反故予詩有涉世偶然龍見爪垂名那羨豹留皮
語君極歎賞

錢布衣粲字倩之少豪逸以不工楷書困小試偶學飛卿叉手

其人卽冠曹偶詩才可知矣中年寥落議論壯健自喜論史絕

句二十三首不終朝而畢王祥云三公雅望孝爲先勸進偏聞

大耋年手脫呂虔刀贈弟果然明哲預知賢

自註祥以孝稱乃年逾八十身率鄭

冲覽勸進呂虔佩刀宜脫以予弟也祥亡子烏衣諸王皆弟覽之後餘篇皆叢殘少完稿剩聯如

郊遊云草荒紅豆尙書墓花落青詞宰相祠頗雋

童童子得號霞水家董溪年十二能畫花卉兼能詩春日臥病

云一病兼旬臥竹房關心調藥賴高堂不知門外春多少紅殺

花梢又夕陽未冠卒人咸惜之

顧處士敬字可堂居花莊幼耽於詩授徒自給初不飲酒後忽

嗜之午課後攤詩浮白且酌且吟藉以舒其抑鬱人皆稱爲君

子以未嘗見忤言厲色也終以苦吟得瘵疾卒年四十五遺命以詩稿殉棺少時嘗寄詩一冊索予評點事閱廿年今觀江月草堂稿驚其所造彌深迴異曩日因又歎詩之真能窮人也雨中曉臥云鶯嬌柳顰風光好水闊山長信息遲千里夢回鐘動處五更酒醒雨來時每聞恨事先看劍但有窮愁盡入詩惆悵著鞭輸祖逖江流東去日西馳登福山云寒城落日戍旗黃醉拂煙雲立莽蒼萬古山憐拋海角三吳地最重江防估帆出港飛鴉亂夕浪衝隄擊鼓鏜幸是太平無警備攀猿弄鶴任人狂溪上云水綠欲無楊柳色風香知有芰荷花書懷云事多掣肘成功少言到由衷出口安皆佳

朱上舍詒燕字蔚亭蕤湄明經子也耽詠工書翩然清雅下世
後得其少作一冊餘散佚矣如過趙朗山寓齋云攜酒坐深竹
披書對好山婁江道中云岸高遲見月水急暗迎潮中秋夜游
昭明讀書臺云一年今夜月六代舊時山晚登靈巖山云月湧
萬峯人獨立雲團孤塔鳥爭栖感興云嬾讀卻因書似海療貧
還恃硯爲田懷盛子履云酒好每思留客飲身閒轉爲著書忙
送燕云漸衰花柳應多感縱好園林肯忘歸

趙武生同標字綠村又字菊初居羊尖市南之綠稼橋喜風雅
予嘗與倡和摹帖云自媿自嫌還自笑不能依樣畫壺盧餘惜
忘之矣

黃文學金鑑字心江號遠亭詠荷包牡丹云探囊豈爲嘔心出
傾國何時笑口開隨手寄託名句也

王康訪家相號藝齋嘉慶十四年翰林官至南汝光道署河南
按察使著有茗香堂集作法出於吳竹橋師而清雅和平無粗
鄙牢騷之調春日田家二首云躬耕二頃田隔歲種宿麥東風
幾日吹生氣回地脈老農出門望殘月一鉤白鄰家已出耕春
泥印人迹我麥何芄芄上天降膏澤時物豈不佳人功亦宜迫
急呼兒孫起荷鋤往南陌十金買一牛牛角何彎環春深綠野
秀牽之出柴關草長沒四蹄搖尾桃花閒春雨昨夜過溝水流
潺潺無事且驅牛浴之西溪灣花片落牛背掩映成爛斑浴罷

自騎去一笛隨風還明秀絕人

周明經敦濂字遠香嘉慶二十一年優貢姚旨雋招同譚石舫
單師白翁二銘宴集城西卽席有懷令弟羽香分得畫字云落
日湛湖光山城淨如畫樓空雲自來窗罅一峯挂觥觥姚考工
豁達除帶芥石舫富文藝吐屬盡金薤單子慕香山文章貫沆
瀣翁伯無高脂負氣乃超邁鳳蠟騰騰燒蟬聯續續話冰鑑匿
昏黥靈臺灼幽怪吾鄉富侯鯖水簿窮鮪鮓流連詩謎迷絡繹
酒兵敗座皆不
豪於飲忽憶君家仲呈藝坐官廨羽香方
就縣試學陋嗤庸膚
文高別流派清才定受知瘦骨詎形憊豈若桐先焦而或羽長
鍛賤子抗塵容頻年苦湫隘局促等轅駒難避謬臺債賦志慚

芝蘭贈言雜管蒯欣附青雲交下風甘四拜未幾染疫歿於浙
江學使署中其他著述惜未得見

周大令榮鼎原名鼎字燮三嘉慶十五年舉人知棗強縣王家
營步張秋河韻云次第淮陽岸風帆千里過鄉心繁短夢壯思
寄長河孤館今宵永前程此去多幾番呼我僕車馬問如何臨
城曉發有裴敝當風疑露坐輪頑跳石誤雷鳴句亦妙

周文學僖字山樵太倉人爲吾邑吳氏壻久居不返予曾與倡
和後乃專力填詞曾鐫稿行世記其跳月辭云吹蘆笙擊銅鼓
編繡籠植鶴羽鬼竿立近七星巖童男艸女竿前舞一聲浪花
歌抑揚思花蝴蝶尋幽芳餘音吹墜東風香此時起舞將翱翔

錦行纏光參差珠絡索搖傾敲如推若引矜且思欲前欲卻慚
相持煥光曼睞合復離目成便許形交馳轉側遷延互趨避連
袂相縈莫相棄插青對對鴛鴦戲不須臂印綢繆記蓮花帶作
聘環上頭笑指鬆雲鬢明朝娶得媚娘還竹王祠裏燒香去大
家齊拜猶低顏辭彩豔麗情景兩得真一幅苗人圖也

錢參軍泳字立羣號梅溪金匱人初遷釣渚後居翁家莊以書
法名於時曾鈔十三經徧游公卿閒刻成親王劉石菴鐵冶亭
諸家法帖著述德編百卷詩格明秀偶成云力田冀豐年力學
冀聖賢苟不存此心耕讀俱徒然嗟嗟利名客甘受世網牽一
朝赴邱壘千載誰悲憐又寄形大塊閒萬事何時已凍蠅觸窗

鳴聞蛾撲燈死知進不知退自古皆爾爾所以賢達人守身若
處子吳興探峴山道場歸雲諸勝云昔欲來吳興人事牽籬樊
今日遂初志扁舟負朝暄遙瞻峴山隈木落秋草蕃窪尊與浮
碧碑倒亭空存道場已在望舍舟扣僧門攀緣入雲封石塔撐
天闢孤峯自迴抱諸山若兒孫老佛對我坐四顧皆隕垣苦竹
出階屺荆棘當前軒仙人孫太初歸雲有荒原不見芳酒酌時
聽松濤翻仙佛苟如此人生何足言佳句如有園翻厭灌花忙
世閒最穩逆風船殘滴猶懸滿樹珠青山慣看轉無詩皆苦吟
所得也

席女士佩蘭字道華一字韻芬孫子瀟庶常配也詩名播一時

隨園以之冠女弟子詩著有長真閣集清超雅健誠足與天真
閣相偶摘錄之以見大凡武陵往返匝月才得數詩所歷名勝
都不暇作抵家則身墮煙熏掌籍中回首勝游渺如夢境矣書
此解嘲云興發西湖遊詩意蓄已久登途便揮毫一日了數首
及至名勝區下筆不敢苟所得題愈佳詩愈難出手初猶略構
思新意或銜口有句卻無篇得奇又鮮偶不如竟閣筆藉以自
藏醜歸家見同人遊槩競索取一笑復無之茲遊實孤負小女
時在旁搖手代分割湖山自清妙目領心已受何必多文辭反
自落窠臼碧紗幮歌云一片碧煙吹不縐滿屋清如綠陰覆四
圍不用玉鉤懸內外空明自涼透昨夜炎風汗體香家家分設

合歡牀尙嫌偏窄難成夢誰識清涼別有鄉此閒大好原如屋
移近花陰就涼宿蟾影依然許照人蠅飛何處能窺玉來朝日
出畫檐明別占虛堂一角清宅豈成仙真可拔廚原有脯自能
行碧紗中人看四面面面玲瓏水晶殿卻笑人從外面來惟見
碧煙凝一片蘇臺懷古云澣紗溪水碧於湖一勺晴波便沼吳
五夜深宮炊粟夢十年敵國臥薪圖捧心智自工狐媚抉目危
空將虎鬚至竟越王臺下路春風麋鹿似姑蘇又謝吳竹橋禮
部惠花云惜花欲獻何人可好把高堂當佛看陸卿子靈真慧
業何以加此

海虞詩話卷十三

單學傅師白輯

翁文學苞封字竹君工書能畫予嘗贈以詩有遠態如乘鶴清
言勝賦詩之句其身頗短而喜絃服累於貧人或侮之乃賦不
倒翁云兒童相競戲侏儒空腹撐持特立軀服美聊還資粉飾
身勞半已辱泥塗人思推倒徒予侮名枉稱翁莫我扶休笑腳
跟非著地此生倔強信區區可謂工於託物者遠遊一賦十載
飄零眷言思之曷勝落月屋梁之感

陶布衣桂森字秋巖善丹青畫志摘其詠殘梅云巡檐空見橫
窗影帶月應無入夢人

翁文學心傳字子唯少年策勵鵲起文譽詩如春游云桃李芳
菲總偶然三條橋畔纜游船可憐一片春光過卻被青山笑少
年擬唐人疲馬云有德奈無力反讓凡馬肥春鏡云妾容嬌於
花君情淡於水寒釭云誰謂燈花喜但覺冷情結用意皆合古
法此予昔所見者與予最親愛而喜入酒場得詩時時屬予加
墨而不盡得見矣今於其家索得手稿一冊清逸而多不壽之
識少作亦不在焉立夏前二日與范筠谷程石函王小阮孫小
樓暢飲云良友不待招日暮忽相聚卽此是天機誰則知其故
美酒須多沽佳肴不多具酒政有寬嚴亦各得其趣幽蘭香滿
屋風雨暗庭樹春光賸二日莫竟等閒度勿謂宇宙廣人生只

如寓謂予言不然春歸君始悟嘉慶壬申秋病瘡贅亂又二年
而卒憶與其弟遂盦宮詹角勝文場時人稱雙壁命竟何如
蔣布衣鎔字晴香文肅公裔負才早卒著有秋雲樓遺稿瓣香
小李秋意云碧海人千里青天月一鉤疏林黃葉晚古寺白雲
秋鴈唳長門冷螢飛綺閣幽江郎辭賦好未盡別離愁佳句如
初夏云好是葵花初向日那堪柳絮正當風供梅云幽室真宜
高士臥疏簾好倩美人窺夢梅云東閣來聯詩酒社西湖去續
竹松盟爲比爲賦殊有法程

張少尉鳳池字苑賓號心蘭爲臬署掾詩頗清切靈芝石云

府志

石在靈巖
寺塔前

天風吹我上吳山石壁高懸共客攀放眼直窮三秀

外置身疑在九光閒煙迷塔頂臨香界徑轉峯腰露翠鬢不覺
聞名癡欲摘延年可許奉親顏

曾文學祐謙字韻卿牧庭大令子體羸多病借詩自遣故篇什
頗多感遇云我無殺人心焉用寶干將干將非不銳失手恆自
傷古來倜儻士閃鑠如劍鉞當其快意時十步勢莫當一朝挫
霜鋒易折皆恃剛不如鉛刀用一割略見長夜半鞘中鳴曷若
善自藏殊有氣骨山前湖竹枝詞云湖頭浪打婆尖觜山外雲
遮女獻花煙水茫茫橋下過不知何處太公家郎住湖西妾住
東朝朝相望一帆風不如同住山前好日采山花紅復紅鶻鵲
峯高積翠微朝天五鶴勢如飛阿儂拂水橋頭立不覺泉珠細

濺衣乍疏乍密山腰雨時響時低水面雷何處操舟堪避暑寶
巖灣裏看楊梅風流雅韻不愧詩人戲贈吳心葵云奇文人羨
倒三峽短舌自雄驚四筵傲岸朱門同白屋縱橫黃卷破青氈
能傳其神

姚明經錫範字旨雋工駢體文詩急於求工屢易其稿每一易
必索予點定囑言云驚飆暗白日急電飛紅雲馮夷祝融怒爭
鬪雷公閼伯愁紛紜海水山立老蛟鳴咽靈鼃愁泣鯨鯢膏血
亂呼吸驚濤駭浪何茫茫飛霆走電燒崑岡鳳凰飢死麒麟傷
但見長蛇鬼魅猛虎與貪狼我乃狂呼大哭叫天地痛訴真宰
不得意蘭佩蓉裳徒自芳隨珠和璞共生忌菑邱奮神勇孤延

趁戰攻鼻端忽出火肘下旋生風翻身赤手持刀弓洪厓仙人
赤松子笑我昂藏磊落意非是過我邀我崆峒游服日餐霞淡
世事鬼斧神鑱苦不拋剖心剗臟遂以死憫骸迷舊恨荆蔓紫
新愁魂兮素鬱結魄兮徒沈浮前身怨抱海中石浪迹幻歎波
閒漚天公哀我心忠直攫我魂到華胥國和風甘雨歲時舒化
日光天耕鑿得醒來一枕山窗涼仰視蒼蒼夜猶黑此詩憤懣
鬱結之氣幾於不可解釋而後路設想幻險比吾際唐叔父友
石道人歌更進一步蓋效昌谷而非徒襲其貌者近體多清新
之句秋夜云詩境清方老愁城靜益深感懷云多病緣疏藥無
才爲廢書破山寺云山瘦高僧骨潭空古佛心野興云山花矜

古豔林鳥鬪清言又如月入扁舟夢亦涼書似梅花不取肥尤
似名流吐屬摘而出之視紅葉出房集面目一變

江布衣抃號鶴琴與蔣芝山同作梅花三十詠經張薏友觀察
點定刻行他作未見今錄棋墅梅一首云消閒樂事莫棋如更
喜寒梅伴我居敲落燈花燈半熄月移疏影透窗虛

蔣處士繼燿字芝山世家子豪於擣蒲嘗擲明瓊指園池爲注
一擲而拱手贈人相傳卽燕園也其詠棋墅梅云疏影斜侵一
局棋輕敲玉子帶香移由來勝敗皆欣喜索得檐前笑眼窺
嚴上舍景煦字于蕃居王市手構栽園爲游憩之所中有小壺
也可廣香瀾亭諸勝士大夫多題詠之張眉卿有能消閒暇須

清福不負林泉有好詩句瀟灑胸襟概可想見用華摩赤釀花
莊韻漫詠二律云倦鳥還飛別樹棲經營小住市廛西隨身一
榻情移境近水三家景印谿踏月卻嫌花影亂面山不覺夕陽
低長生求藥人癡絕無賴吟詩且借題子荆居室任天全隨遇
安安不計年煙陌今番聊卜宅花畦儘許變爲田絲竿漫訝攜
桐叟石丈頻呼學米顛若問蓬萊何處是清閒便是地行仙客
窗雨云淡煙細雨暗江村盡日吟詩但閉門小憩不成春草夢
峭寒留得綳袍溫紅淹芳徑花如客綠浸苔階竹有孫閒煞東
山舊遊屐莫辭清醞醉黃昏

鄧學博琳原名復讚字翊廷嘉慶十八年舉人官金壇教諭山

左道中和江樹叔韻云打面西風十丈塵南沙河北問迷津詩

看四壁家家玉酒買三升頓頓春恰喜歌風同七子定期捧檄

慰雙親望中柳眼青如許會見朝衫染汁新又徧贈同人一律

云春風一路上京華結得仙班跨紫霞座上紅牙爭顧曲周璧三榮

唐康封周茂夢中綵筆早生花江樹叔之升賣刀政績他年見龍杏村榮鼓

瑟才名此日誇錢玉璠况是金張舊名閥鳳凰池上認君家硯金

香激張秋河應星按是年爲己卯計偕同行者八人金與周茂唐太倉

人也

陳大令觀理原名理字梅江嘉慶十八年舉人知蒙城縣客淮

上作冬夜吟云遙思蓬戶內二老對寒燈共話淮陰遠相憐白

髮增飽尊清有酒布被冷於冰昆弟承顏色冬溫我未能王家
營步張秋河韻云征夫旁午地足迹乍經過旅夜愁聞雨閨中
話渡河詩懷燈下冷沙影馬前多翹首龍城裏春光竟若何爲
予亡婦題玉花閣遺詩後云珠玉紛紛散綺樓蛾眉亦自爲千
秋有才不敢聞夫子借問名姝得似不至性真情任意哦吉光
珍處豈爭多搜殘遺篋君休恨增一詩增淚幾何一時稱爲高
妙

鄒文學位能字雨塘居小山營寓城中夏日苦熱作詩云我家
虞山陽石室欣咫尺傳聞師尙父曾此結幽宅窈然雲窟深古
寒洩地脈澄潭鑑鬚眉石罅滴珠液峭壁巒岼園窺天一線窄

長松峯頂號陰氣相疊積深山無六月赤日何從炙人暑我清涼緣崖頻杖策矯首恣徜徉快尋方外客淪茗汲甘泉風起玉川腋談經悟無生嵐光照禪席卽此忘世緣弗煩逃藪澤一從塵網撋回首煙霞隔轍下駒可悲籠中鶴不適夜夜月橫窗夢繞空山碧

郭明經忠訓字古漁幼有神童之目今居蘇城題張荻洲先生蒲江政績圖云吏治崇經術名賢溯我鄉居官無粉飾樹績泯張皇九折山盤蜀雙飛烏化王下車諮父老大利重農桑曠土田非石比鄰水曲防通渠追鄭白惠政繼龔黃灌溉周原隰菑畚足稻粱

第一第二圖

鑿山平塋埆計畝墾燕荒高下歌其穫

南東益我疆生碑臚口頌成算富胸藏 第三圖 積仿常平穀儲

充不涸倉盈虛勞酌劑豐儉費裁量 第四圖 課士勤文藝甄才

盛序庠雲淵經治鑄霄漢競翱翔杜廈幃幃廣文翁教育長 第

五圖 化鷗馴似鳳驅虎易如牂物以誠能動神惟敬是將害除

潮徙鱣快祝汝游魴 第六圖 婚媾張弧久平反折獄良燕釵離

復合鸞鏡黯重光 第七圖 原茁如飴董家封勿剪棠鶴書徵觀

闕驪吹促行裝鐙截岷江畔懷攀劍閣旁征塵追絡繹別淚灑

沱滂 第八圖 比戶戚斯歎傳家善必慶韋經陳篋笥鄰架燦琳

琅哲嗣珠爲樹蜚聲玉作堂麟毫垂夜露豸節肅秋霜翰墨貽

芬馥孫曾詠熾昌益州留畫像愧莫罄揄揚才藻氣度綽乎有

餘而能細切尤佳荻洲先生於乾隆丙子丁丑閒宰蒲江政績
詳吳竹橋師所作墓誌令嗣子和觀察繪圖八幅藏於家曾孫
芙川上舍出以徵詩予亦有作

季布衣士訢字尙迂喜填詞宗姜白石著問紅詞草余嘗序之
書法李北海而絕似董思翁正陽門關侯廟碑遊京師無所遇
而歸詩不多見僅見其題蘇培蘭僧服小照云浪憑熱客笑癡
頑人在非仙非佛閒看到鬚眉心自古丹青以外卽塵寰飢來
喫飯倦來眠老去還參畫裏禪留得破蒲團一箇此生舊物勝
青氍又題道服云便是人閒一散仙周妻何肉一年年興來寫
幅青山賣無事何妨自在眠三閒老屋長蓬蒿萬里青天月正

高何事隔牆聲澈夜有人痛飲讀離騷培蘭能畫耕虞子也居
賓湯門內與尙迂比鄰詩意骯髒可掬也

吳布衣哀字昭融河亭柳云非是貪眠不自由繞亭裏裏慣低
頭春風無限懷人意青眼其如付碧流蓋遠遊不遇作也

單布衣學敏字梅江予從弟也楷法師顏魯公困於童試年逾
三十未青其衿忽患鼻疔以逝知其才者咸惜之賦得十月先
開嶺上梅云十月韶光正未回一枝忽見嶺頭梅孤標不讓蒼
松秀冷蘂還同晚菊開剛道臘前春尙小那知高處氣先催南
中景物真堪愛江草青青亦未摧詠雪云清光滿地如堆玉寒
氣侵人似飲冰好是芸編輝映處小窗聊當讀書燈探梅云東

風料峭雪花飛試探寒梅可覺肥折得一枝香在手隴頭春色帶將歸皆姿致楚楚

湯布衣錦字粹章少喜吟有綠滿齋詩詞稿年三十五得風痹疾自知不起作訣別辭六章時道光九年也其弟鉅爲付梓人茲摘錄之趁取衰殘未死身病中排日晤交親臨危聚首時原暫訣別談心意更真賤子姓名將次舊諸君事業逐番新酒邊花下應思著痛飲狂吟少一人悽切動人

王布衣恩照字小苑石谷仍孫也少歲與翁子唯程石函輩放情詩酒三人皆止中壽詠黃薔薇云轉瞬嫣紅蛇紫消殿春迎夏賸雞苗檀心細簇蜂鬚膩蜜瓣輕黏蝶粉饒自有金錢能買

笑不須釵鳳已添嬌黃裳黃裏風流甚婢學夫人正未侑水晶
簾外試芬芳不共籬東菊傲霜摘藥曉光迷寶釧簪花新露溼
雅黃阿嬌品重宜金屋青帝恩深賜赭裳滿院清陰香一架綠
肥紅瘦正斜陽清華逸宕嗣響西崑題予釣渚詩集云力追正
始廢妖淫不是風雲月露吟沖淡更無寒瘦意幽蘭空谷靜操
琴予雖有愧其言然識力固可見也

陳布衣祺號潛道人湖州籍以鬻筆長居吾邑能寫山水花竹
翎毛雖未純正而豪逸可喜題畫蘭云人惜幽蘭香旁有荊棘
在荊棘護幽蘭免得兒童采詩格亦如其畫云

殷副貢鏘字鳴球號石溪烏程人嘉慶癸酉鄉試副榜道光三

年僑寓吾邑居與余鄰爲人豪放議論風生飲酒無算爵詩不多作僅見其詠新燕出巢云爾燕雙棲幾許時舊巢今已哺新兒梭風掠雨辛勤甚溼盡烏衣尙未知那知羽翼一朝成撇母高飛弄晚晴轉瞬天涯杳蹤迹梁閒猶聽喚兒聲微諷緩刺使旅客聞之當有不堪回首者

僧際昌號可菴無錫人主持維摩寺工書兼善寫蘭竹郊蘭坡畫移居圖爲補遠山并和原唱云長醉人閒何用醒幽居仄巷小門扃春蔬翦圃拙新甲臘釀開缸鬪老丁無曲和君吟雪白

自註居士新刻
白雲山房詩草

有圖倩我補山青明朝欲折河橋柳最憶辛峯

似翠屏

自註詩
歸桑溪

蓋詩與畫俱楚楚云

曹孝女芸字繼芬一字誦清居西城染坊巷文學毓奇女母繆氏鍾愛之守貞不字嘉慶十四年已逾周甲弟立堂名義爲請旌表幼延江仙洲孝廉藻鑑爲之師多作試體詩梓行鎖窗自試集詩格大類其師其餘諸體氣頗壯健運用書卷大異從來閨閣之作龍湫井云虞山舊有龍湫井一泓碧水長沈靜轆轤綆斷杳無聲銀牀何處尋高嶺此嶺扶輿秀氣鍾奇花異鳥爲之宮閨昔有女孕奇物裂脅破腹生神龍神龍初生頭角具蜿蜒夭矯能高沖法雨纔施一勺水雲根劈破崖千重噓雲噴雨知何處崢嶸尺木登天去賦母年年一度來淚珠落井傳黎庶我陟高岡倍黯然春來埽墓卻留連嚴親已作遊仙夢萬壑蒼

茫起暮煙舊井无禽賸遺址寂寂波瀾永不起遙聽濤生風入
松如聞春暖龍吟水美人紙鷲云飛燕真疑出掌中薛濤箋紙
製來工蹁躑似挾鵞勢縹緲偏乘放鵠風豔態正愁紅雨溼
芳姿獨上碧霄空兒童不識淩虛步錯認姮娥降月宮佳句如
金山云三楚波濤天地外九江雲物有無中佛手柑云宛轉可
堪繙貝葉招邀直欲指迷津又豈向如來忘合十故教能屈不
能伸

屈女士秉筠字宛仙畢節令曾發孫女適趙子梁文學少習詩
畫鉤染花鳥白描尤工著韞玉樓集對月云珠箔卷妝臺紅窗
手自開低看花影動仰見月光來燭轉銀屏暗秋從玉笛催小

鬢呼不應喜有素娥陪佳聯如十六夜月云還疑今夜望未減
昨宵圓冰豆腐云羹合供浮白敲還笑硬黃對雪云誤認月光
雲母紙暗思風味水精鹽燈夕云鑪香細愛穿花去壁鏡深疑
有路通聽雨和子梁云清夢一城寒瑟瑟疏窗六扇暗冥冥插
菊云一點夜燈爲夕照半壺秋水是東籬至病中語子梁謝索
詩畫者二絕句則閨閣才人可書座右矣祇因遣病學塗鴉那
算書家與畫家今日病人心血盡一棋誤著到頭差枯硯敲殘
力不支紅蠶猶吐未僵絲翻思未飲香名日儘有含毫得意時
又自感云身病方知名是累家貧祇覺事多難若自悔悟遲者
中年卒

海虞詩話卷十四

單學傳師白晴

楊文學希潔字過飛玉山子能畫性敏給或侮弄之弗校也梓
行虞邑幽光集搜羅不憚勞苦嘗大書孝弟忠信禮義廉恥八
字於屏而各系一箴繼志述事孝之大要我侍我親子孫所儆
喜懼相乘昊天難報每念及此急宜盡孝書曰克恭詩歌常棣
分爲異形實聯世系長幼親疏何可乖戾每念及此云胡不弟
盡己之心是之謂忠事上接下篤實可風苟且從事豈曰由衷
每念及此羞死姦雄詐僞非信虛浮非信自欺之人漫以取勝
豈無先哲久要身殉每念及此事求意順驕淫縱逸是爲無禮

禮以束身相鼠有體人而無禮詩人所詆每念及此無禮盡死
不易者義至變者義義之所在可以制事無過不及惟義所使
每念及此以義爲利尙奢侈者貪得無厭守之以儉乃不傷廉
貪夫召禍富亦徒然每念及此取與必嚴世無難事只少一恥
甘爲人後無恥而已人能有恥乃可奮起每念及此恥之欲死
所言皆能舉要有志躬修者觸目可警心也又雙孝詞序云嘉
慶辛未夏請題旌母氏節孝而先仲伯父諱景珏及先父孝行
貧不能舉作此以志哀痛云哀我父仲伯父兩孝行足並著遇
火災勢難禦我祖母心恒恒伯負之身生羽伯年長遠服賈父
家居侍我祖祖病歿父無怙哀毀深藥爲伍我祖母目如瞽父

銛之光如炬兩世棺葬無所父曰嘻屋可去謂仲兄既相許并
力謀封且樹地有隙供祭俎潛闔安家終喪伯養母具雞黍遠
負米出門戶祖母病父勞苦任勞苦摧肺腑是月也天方暑遠
覓醫求病愈夜蚊集如雷鼓侍牀側扇難舞衣木棉汗如雨暑
氣蒸口血吐病益深力猶努祖母歿躬負土栖無椽具舟艣病
纏身作羈旅悲蓼莪如荼茹越年餘入鬼簿死之日年廿五垂
絕時囑我母喪未除殮麻紵葬附親死相聚時伯父乏鴛侶謂
親志終子處此兩孝母常語請旌節吏不拒請旌孝吏色阻云
爾貧恐難舉每念此髮欲豎將請縣復請府府不允訴巡撫撫
不允訴禮部母曰兒何太腐兒出門家無主兒出門行踽踽姑

待之毋莽鹵徒自苦恐無補兩孝行吾曾覩琴水清虞山晤兩
人名共千古信筆序事肫然出於天性之激發并足以激發人
之天性宜乎有子英彝之盡孝也英彝字彝陶生有至性嘗輯
海虞藝文目錄未竟而卒乃父爲校補而刻之

秦文學承孝原名晉號藕香居東徐市賦楊花四律人稱秦楊
花如飛處問誰同雪賞開時有客怨春殘略似客遊蹤不定絕
無人捉影何忙此後雲泥能定否從前眠起太安然洵有意致
又書扇云微風一陣旋拋卻何必秋來始少恩亦善於翻進一
層者

章明經俊民字英秀號友梅居東徐市短歌行云對酒當歌憂

來奈何拔劍起舞涕下如雨一解人好讀書終身迂愚人好談

道終身潦倒二解東鄰販脂兒女嬉嬉西鄰賣漿意氣揚揚三

解憂從中來莫知我哀涉彼北園言采其萱四解又愁裏銜杯

先自醉悶中開卷過隨忘其情之困頓無聊盡寫出矣

徐醫士仁字介石世爲小兒醫有自怡草五律多佳構閒居云

自喜心常逸朝來起亦遲愛花誅蔓草護筍障疏籬只有茶消

渴曾無藥療癡爲慚逢世拙失意不須悲漂流渾未厭聊復玩

雲煙花鳥分閒趣詩書結靜緣有身終是累無子卻如仙忽起

滄洲想晴湖放釣船君有一子爲延嚴師讀書五年竟不能識

一字故感慨良深也雛燕云小燕憐黃口離巢身便輕試飛還

費力學語漸調聲亦有依人態甯無戀母情漫將思遠舉未易
羽毛成和友夜坐云空齋夜氣涼孤坐厭更長關塞來鴻鴈郊
原熟稻粱一朝辭世網千首貯奚囊會得寬饒意於今只醉狂
月上人久居海外憶賦云別來年歲改兩地信沈浮不散愁千
斛常教夢十洲杯從銀海渡詩付錦囊收何日松枝轉掘衣拜
賀休獨宿云燈火微將滅鑪香冷欲殘風聲窗外聽月色帳中
看獨夜心常恐孤眠夢亦單平生湖海志肯念畫樓寒隸事選
聲皆入妙境佳句如感懷云知心常厭少恨事不勝多卽景云
脫鉤魚力健貼地燕身輕草堂云只知操瑟賤肯信閉門非月
夜云薄酒不成醉清光難久留七言如人正愁時月更明句亦

佳

吳布衣協忠字敏齋鳳銜文學子早卒書懷云小住清溪九曲
灣寂無雞犬掩柴關圍棋偶學神仙戲按劍頻開壯士顏涼月
照人疑在水晚雲封屋便成山扁舟擬溯銀塘路蓮葉蓮花手
自攀又月光飛破片帆來亦佳句也

沈孝廉毅字華麟嘉慶二十一年由拔貢生中舉人姿清學篤
早卒嚴栽園園中看菊云闢得柴桑十畝寬西風簾卷露珠團
但教白眼看常在便有黃金鑄亦難清瘦精神殊絢爛老成風
骨不孤寒莫須栽共南山杞似此心情配畹蘭同時郭銀塘晉
培和韻有如許幽情位置難句以供菊言不切而切

張學博豐玉原名承渙字子謙叔因侍御孫官海州訓導慕尙
清遠題英如弟釣鼈圖云青蓮一去已千載海上何人更釣鼈
讀畫喜君有奇興長風萬里壯秋濤我臥滄洲百不爲神游汗
漫尙堪隨休將絕技輸龍伯看取長竿一掣時

王醫士馭字心陽號眉坡性高蹇多誦覽尤熟東垣景岳之書
詩如登楞伽山云獨上楞伽山山花笑人來山下太湖水蕩我
胸懷開願乘彩虹去超然遠塵埃結侶鷗夷子其樂何如哉露
坐云恍如人境外可以閉玄關露重星河爽風微竹樹閒浮生
輕夏屋往事負秋山坐待天邊月招尋香案班七言如雨中偶
成云桑落香清須盡醉桃笙涼透正堪眠秋感云癡蠅就日無

愁思病葉依風作苦吟生平所作不多然正非鹵莽從事者比
姜明經鉞字子誠號渭川居王市題嚴氏栽園絕句如釣磯云
不以得魚樂一竿風引斜機心久忘卻坐老古苔花寄閒亭云
人生本如寄胡爲勞其形俯仰苟自適乾坤一小亭香濶亭云
茵菖一池花倚欄香四面風吹荷葉開人與鷗相見皆脫灑有
遠致

姚文學錫鬯字羽香旨雋明經弟也清姿濯濯譽溢青年從予
游後始事精深之學鑽堅之力可糜鐵石古今體詩不多作而
游破山寺有門壓四山寒句荷錢有裝憑藕作船句筆牀有生
花夢熟共盤桓句乃僅青一衿年甫壯得貉血疾絕命辭云指

爪寸餘長瑤琴彈不得欲翦弗忍加一朝還自折聞者傷之

程文學學思字蟾香苦寒力學尤推服不佞中年暴疾死未有
嗣明日母以悲死又明日妹亦死天道何慘酷也詩格雅飭爲
友題趙松雪畫馬云馬高八尺稱神龍子昂筆妙超凡庸昂藏
意氣躍紙上烏騄隱約存孤蹤金羈玉勒付駕馭仰首一鳴千
里去圉人只恐去路遙纒挽青絲暫留住誰爲主者當權奇紅
塵蹴踏收神姿伯樂九方世不見幾與駑馬同鞭笞奇材畢竟
不可掩拂拭有人增氣燄曹霸能傳駿馬神王孫亦復工綉染
斯圖自元且歷明宜君寶愛錦篋盛題詩我愧丹青引展卷如
聽噴玉鳴佳句如感懷云流水有情能見道落花無語黯銷魂

和予詠蘭云密葉數叢俱馥郁素心一點獨精神

衛上舍栻字雪香本富家子由釣渚徙城中中年寥落遂多愁
苦之吟愚溪弟招飲宛溪舊居云愚溪具雞黍酌我灌花莊明
月一庭冷秋花滿地香親情聊共醉心事漫相忘對景不成寐
披衣坐夜涼春夜課子有感云紙窗吹裂北風寒小坐書齋聽
漏殘青眼有誰看志士白頭無分效微官人因誼古交朋少子
爲家貧就傳難莫學世情空炫耀紛紛只愛沐猴冠

吳大令嶽字兼山幼隨其父玉泉先生宦楚父殉苗難痛憤激
發轉徙川楚戎幕中輒欲爲灌夫所爲旣而走京師以文章議
論歷抵卿相得狂名而詩益倜儻多諷諭其規格足以抉浮振

靡此德清陳白雲斌序紅雪山房集之語是時年甫弱冠予嘗
見之而心儀其英特今則浮沈僚吏年倍氣衰矣復以審案失
入落職遣戍嘉慶癸酉紀事云曹滑倉皇夜合圍定陶父老幾
人歸河魚東上桃花漲宛馬西來苜蓿稀劍戟轉因農器鑄芻
糧空見羽書飛中原久已無征戰莫訝連村晝掩扉森森劍佩
列朝班天上何曾有險艱無數蟲沙千佛劫一時風鶴八公山
雲雷竟出幽冥外玉石終分指顧閒快讀昇平寬大詔聖人恩
重只鋤姦六軍徵調重兵符響應登高在一呼老病人扶大司
馬踉蹌官笑執金吾忽驚傳箭飛宮堞又報分餐出御廚指點
軒轅星象動萬靈呵護擁天樞一城斗大破圍時三月頻看捷

奏馳高克逍遙河上騎鄒虔慚愧賊中詩深溝豈有千年險隧
道空傳九地奇笑指終南天尺五櫓檣急爲埽潢池觀其命意
遣辭陳白雲序所褒爲不虛也

王布衣茂森字雲浦自幼居虞山書院司灑掃啓閑暇輒弈棋
藝花閒學吟詠積久成帙題曰梅隱吟草自詠云一枝禿筆半
牀書幾樹梅花伴竹廬養性未應親市井託身何必遠樵漁閒
看丹嶂塵心淨久讀黃庭世念疏又是一番新雨過藥苗階下
帶煙鋤又詠桃花云薛濤魂化錦江空悼亡佳句也午日云蒲
劍無鋒自辟邪更見身分

金上舍慎思字鐵香家慈烏村後遷東城靜默寡言客西郊姚

研山廷輝家研山喜購書畫因得見所未見而書畫亦進寄補
巖兄云被共姜家好其如徹骨寒貧來分手易老去傍人難此
意空相惜何時更接歡寄書期努力不僅勸加餐又金山寺有
山湧浪花中句淨明寺有松健欲擎雲句皆可愛

錢明經廷鏞字晴嵐父大章以進士宰樂平君以增貢就順天
鄉試屢躋而歸詩筆清俊北郭落地梅營生壙成書懷云旣傍
青山復面池樂哉歸宿竟於斯境幽差幸樵薪少地近無憂麥
飯遲松柏漸看成美蔭煙雲先爲護平時周圍徧訪文人冢異
日須邀共論詩今晴嵐故矣吾不知其地下吟興又何如也

陶上舍晉字逸亭豪俠好義常與陳杏村大令士林唱和有柳

塘詩稿同沈葆亭綸宣叔姪訪蓮溪上人不值云扁舟維野岸
信步扣禪宮瀑布千尋雪松濤十里風人來青嶂外寺隱白雲
中卻笑塵凡侶無緣謁遠公秋柳云幾樹臨風葉半黃柔條那
更著新霜小蠻丰韻今非昔爲語多情白侍郎詩多蘊藉美不
勝錄余於龔文學縉熙西窗詩話中摘此二首爲之高詠者累
日

錢布衣瀛桂一名中祚字閬香倩之布衣子也性落拓以曾子
蒸藜之嫌去所偶悒鬱早卒作詩數首曾以示予哀婉不堪歎
爲絕調惜稿已佚錄其漫興云年來詩酒度昏朝水畔爲漁嶺
畔樵紅豆春情雲漠漠碧梧秋思雨蕭蕭海澨可釣空題板斗

米難叨漫折腰自愧才非王佐匹此心未易樂簞瓢餘如新秋
云月移梧葉墜水動藕花香又綠窗人預憐花瘦幽砌蛩先促
漏寒詠絮云悠揚似有淩雲志可奈全身氣力微皆繇密

姚女士素珪字靜儀邑諸生王外雲宮桂配閒似樂昌孫氏有
代夫詠燭之篇以外雲不習韻語故也尤熟五代十國史事撰
傳奇三種蘭閨人皆嗜同膾炙詩名伴雲小詠予爲之序感懷
云忽驚臘盡又春來料得陽和應早梅悵惘試裘開畫篋低回
擲翠傍妝臺賸憐青鬢隨年減豈有朱顏逐歲回對鏡不堪虛
後影無端烏兔更相催此自傷無子之作淒婉欲絕對牡丹有
感云曾無酈綠三杯醕易爲鞋紅兩黛顰水仙花云玉盤金盞

承朝露秀色幽香領早春皆雅飭中年而寡壽八十餘

海虞詩話卷十五

單學傅師白輯

翁宮詹心存字二銘號邃盦紫書學博子也道光二年翰林今官詹事詩多瑰瑋之章嘗記其北陸一律云北陸迎長日南陔慶錫齡雪窺雙鬢白山映一衿青就婦謀春酒呼兒誦孝經梅花消息到采采發芳馨此爲諸生時作具見格律

江學博之升字樹叔嘉慶二十三年舉人官婺源教諭臨城曉發云布衾坐擁聽支更倉猝登車夢未成身灤始知僮僕冷路修漸狎馬羸鳴一彎明月銜山去十丈黃沙匝地生心醉利名翻獨醒踽涼侵曉問征程錢孝廉毓麟字玉書同年舉人有和

章未及錄

黃副貢金臺字子珊嘉慶己卯鄉試副榜自石岸頭移居西塘
市有醉鄉仙館遺詩許八兼選定門人曹文瀾刻行時見矯拔
之概題楊築圃半體圖云昔有習鑿齒但得稱半人君姿特英
爽昂藏八尺身畫師伊何故半體傳其真君心乃出人意表處
世無如得半好月當半吐光漸圓花到半開色未老矧君寓意
非一偏半愛今人半古賢寄迹任山林城市陶情及觴詠管絃
爲歡百年君未半順時知足甯求全君能知足知不足一編又
向圖中讀自註圖
手執書改詩云懺悔力除閑閣語縱橫不傍宋元門
性情具此矣中歲卒

邵文學淵穎字實甫人品峻整題王雲浦茂森梅隱吟稿云詩
借梅花點綴工應嫌脂粉澣東風日長山靜攤書臥此福何如
足穀翁推敲清詠稱幽栖獨步時過石澗西綠竹萬竿梅一樹
煙霞佳處任留題

查文學鳴球字粟香家釣渚其母氏爲予從姑孀居孤苦粟香
稟慈訓力學能詩詠霞云空碧粉技錦萬端噴金飛火耀斑斕
光搖海氣連天起彩掞雲英帶雨殘北郭晚晴城盡赤南山朝
霽嶺成丹願隨餘綺通銀漢更取天孫杼袖看佳句如世事難
醒先戒酒局情多劫怕觀棋

馮文學晉璋字子達家藏其祖復京先生明右史略手稿并已

蒼先生含詢頭陀像邑中之以詩世家者也適投詩索評因錄其詠蠅一篇語意蓋有所指也炎炎熱氣中飛蠅來無方拔劍怒相逐睨視仍在傍藐小此蟲蠶投隙終難防逐臭事則宜趨炎情亦常我室繞竹樹枕簟風清涼窗明潔几格篆縷縈鑪香疑汝將絕影遠遁不吾妨胡乃聲營營紛飛恣披猖或集於眉宇或萃於衣裳或渴飲硯池或飢噉朱黃穢惡遺茵席黑白玷縹緲此去彼復來終日徒跳踉以汝貪汙性想見腥羶場引類百千萬攢聚羣回翔食盡無留餘振羽仍他望我欲取此類盡散毋徬徨天意儻未然使我長悲傷

顧廣文召春字叔真道光元年舉人官宣城訓導家東徐市作

吳市司馬烈婦顧氏詩語皆記實云夫病忽拋妾齊志重泉志未愜妾心許報夫相期百歲盟難渝高堂侍養有叔在况復懷中未有孤井泉芳冽知奔赴了此一身復何顧遺骨埋來土亦香精靈猶化冬青樹冬青樹成連理結縭六月等閒生別離兩日相隨死至今冬青樹連理在吳市

席文學振遠字楣生專精駢儷之學漢魏六朝唐宋皆討其源流而涉筆俊爽才亦副之蓋拔起於後生之中者太白樓云騎鯨客去渺清風今古危樓枕碧空天地浮名詩卷裏江山靈氣酒杯中狂歌黃鶴無崔顥豪贈金貂有令公五百年來無此樂祇應高唱大江東豪氣足以振式浮靡也又劍門銘亦妙序云

虞山之巔有三沓石層崖聳嶂豁若中劈名曰劍門俗傳爲吳王試劍石顧其秀削險怪之狀迥出天造系之以銘曰虞峯嵯峨有門中割雲霞表裏陰陽闔闢犴霄漏青檄煙彌白銅鋪繡苔金扇瑩石詎于將之所剖儻巨靈之所擘我欲叩關以窮其奧將毋金母之宮木公之宅

徐處士朝忠號西樵小試僂得仍失隸書頗饒古意甫逾弱冠道光九年卒士論惜之有補雲仙館詩稿秋日遊虞山云長峯插天起短峯裹雲裏長峯短峯青不已嵐光直接十餘里我遊中峯復三峯一雙不借雲千重長嘯無人衆壑應獨寬眼界開心胸峯回路轉忽幽邃殿角朱紅明古寺寺古林幽深復深黃

葉堆門秋滿地坐久愛看泉水清不知晚翠前山橫斜陽影裏
獨歸去送客惟聞鐘數聲

楊畫師旭字曉村號樗散道人以染寫花卉名於時東籬佳色
其最工者也家素貧而鄉里一切善舉不憚謁告富室以成之
皓首龐眉恂恂溫雅故人亦樂從焉詩有澹遠之致蘇州吳翌
鳳曾選入卽須集茲得其虛白草一冊爲別錄數章題綠野堂
云此地在城市條然堪掩關杯傾元亮酒簾卷仲雍山閣小風
來細庭空月去閒何須親蠟屐一榻任雲還詠菊次唐葵心韻
云霜凝荒圃傲秋英載筆來看老眼明嗜畫絕無癡似我

自註
時下

楊抱遠香齋對
菊草成十二紙

苦吟應更瘦於卿繁華桃李俱陳迹寂寞蒿萊

獨晚成相對一尊桑落酒不知籬畔夜寒生題放生簿云休誇
山翼試南京且聽飢雛失母鳴一一巢中猶待哺豈知已作席
閒羹此從勸君莫打三春鳥子在巢中望母歸翻進說也時有
馬蘋香者瞿蔭堂邀畫花鳥未竟而卒瞿君爲殯殮而周恤之
并屬曉村續畫成冊曉村有詩記其事蘋香曾在唐葵心家詠
菊云雪泥鴻爪知何著來歲花仍老圃黃情可憫矣

吳畫師湘字西巖號靜芳工寫花卉楊曉村之門人也秋日遊
山云纔穿雙屐展望松杉愛此幽尋上翠巖惆悵空山殘照裏桂
花如雨落秋衫春陰云曉煙漠漠籠花香綠暗雲遮半榻涼好
鳥頻啼喚春夢蝶魂飛不過紅牆友人山齋云幽居深鎖白雲

灣徑滿蒼苔靜掩關爲有攜琴人到卷簾青入一房山皆不
減宋人也懷友云千里雲山勞我夢一編風雨讀君詩更覺自
然又蟬急知秋近五字亦妙

趙孝廉允懷字闇鄉道光五年舉人少有詩癖以桃花紅過清
明節便不飄零亦可憐傳誦邑中故予題其詩集有飄零莫爲
桃花哭實結綏山自有秋乃未數秋而君登賢書予詩實爲之
兆矣友人將攜琴出游詩以止之云誰是知音者而君尙抱琴
成連已仙去海上杳難尋况有白頭母能無念子心何堪遠行
役空望暮雲深按友爲季尙迂喜爲長短調將挾以北遊故有
此作後卒無所遇而返他如東臯草堂云一身獨結前朝局隻

手空成擁立功報孫耕吾云才無可用難言學酒若能消豈是
愁寄子瀟先生云九州無地容王粲四海何人說項斯游仙云
怪煞劉安成道後門前雞犬亦驕人又殘花孤似客旅食儉於
僧久閒詩卷富多病綺懷消皆辭意清雋其族曼華主簿全昌
原名奎璇以諸生輸貲爲詹事府主簿予門人也能畫亦能詩
單布衣學太字再白予胞弟也工篆隸詩學左司而頗似倪雲
林釣渚亭云偶坐石亭中斜陽散紅碧波冷釣船稀下上蘆花
白逝者不可留送盡往來客題畫云山空徑更深水清岸多曲
幽人拄杖來十里松陰綠日沒聞吠尨白雲滿茅屋夜吟云良
夜天如水沾衣露氣香雲浮千嶂白月照萬家涼客夢愁邊短

蛩吟靜裏長高空度鴻鴈無札寄瀟湘姚旨雋題其詩草有始信味甘回諫果不須更饜五侯鯖句亦善品評也

單布衣學元字友白予三胞弟家貧少學賈依人而好吟詠渡江云寒潮未退五更前白露浮浮水接天帆滿客舟騰欲起浪花聲卷海門邊夜泊福山港託友寄家書云一篙潮退夕陽天夜傍西巖枕海眠畫角五更驚客夢家書還憶各分船至述母語一首則尤爲予所不忍讀者昨夜燈花幾度開望兒今日自然回扶藜看盡往來客門掩夕陽心漸灰

王文學應申字心齋從予游先世喜藏書而不與士大夫往還故人罕知者仁和鮑廷博往往買舟過訪所刻知不足齋叢書

中有數種實從生家購去生亦蕭然清素不墜家風有雜詠詩
云自得幽居樂翻嫌少暇時焚香先掃地玩帖自臨池近水窗
常啓當山幔不施弟昆無所事呼共夜燈棋意遠機方悟心閒
趣自真往來多幻夢今古幾閒人松菊情堪戀煙霞態可親但
教清福占韋布勝垂紳軒騎衡門絕城居似野村壯懷愁劍化
遺業幸書存琴罷絃留韻詩成燭賸痕丹鉛今欲廢心事與誰
論邂逅守衡茅癡頑任獻嘲世無青眼遇人鮮白頭交製藥招
醫究栽花借譜鈔年來生計拙硯席轉難拋酒興隨花減詩情
共月添忤人惟好直約已素能廉落落忘清苦悠悠付黑甜所
難泉石癖未可用鍼砭少年胸次有此曠達吐屬竟致早卒傷

矣

歸孝廉章字問軒道光乙酉拔貢戊子舉人題郊鐵蘭千秋一
插圖云何必沈酣醉醪醑後塵才許步劉伶千秋消受清狂福
怪眼一雙不肯青真畫出鐵蘭矣

張文學爾且字眉叔少年卽沈酣於詩感慨悲歌語多奇警才
足副其所見在詩壇中爲後起之英結客少年場行云五花寶
騎千金裘匣中劍氣冲斗牛登堂一語露肝膽誓捐七尺軀相
酬張陳結交皆豎子相逢意氣徒豪耳出門不謁信陵君勿顚
當從季心死擊毬走馬長安道呼酒墟頭醉傾倒褻昵金盡不
須憂挾彈朱門事貴游悲歌擊碎珊瑚玦熱結荊卿一腔血玉

龍夜嘯秋風酸誰使男兒牖間歿君不見豪家買笑積黃金不
買人間壯士心寄武林曹十松丈云羞從豎子稱知己怕向窮
途說感恩氣骨錚然近年閉戶讀書益歸沈靜造詣正未可量
也迨嘉慶戊寅予居北水關枉過見贈云冷巷梅花裏敲門雪
滿身琴書無俗想城市有詩人趣每閒中得交從淡處真清談
催煑茗喧不到紅塵詩境已覺一變

蔣布衣寶齡字子延號霞竹家東徐市僑居蘇城以賣畫爲業
詩主清真嘗畫破樓圖徧索題詠爲二香從父作鬻硯行云得
米奉親自飲水臣叔一寒竟至此索逋人去且閉門低頭學書
日十紙可憐學書不療貧堂前老母白髮新承歡昔日與婦共

今日婦亡惟一身朝來便擬出門走含淚牽衣辭阿母阿母涕
泣還語兒父喪未葬兒應知三間老屋賣不得安所趨辦窀穸
爲嗚呼兒窮已到骨兒亦隨身無長物無棺不葬兒出門天下
豈有無父人珍重囊中一片石脫手街頭萬錢值淋漓四角墨
繡痕誰知中有孤兒血鹽鐵塘南舊邱壠歲晚荒村深雪擁一
夕艱辛畚揭完居然馬鬣成高冢歸掩蓬門仍苦飢三生緣盡
石交離眼枯淚竭何人覺難問鵲之與鴿之曲折盡致又謁沈
文愷公祠云暮年遭遇如公少近日風騷繼迹難含蓄得神皆
可愛也

沈上舍述祖號雪舫莫愁湖云四面山光齊欲笑六朝人物本

無愁人皆傾賞

范布衣顯達字春泉隱於書肆製黃葉詩百律自序稱隨緣借
景魚兔不滯乎筌蹕感觸相生風水交忘於汗漫佳聯如品超
量碧裁紅外勝占荒煙落日中去悲秋憐汝劇寒來失色望
誰溫久長風煙甯礙日曾叨雨露豈辭霜布地比金差狡獪淩
空學舞宛嬌慙長愁偃蹇翻招鶴恰喜荒疏也蔽牛幻作玉關
塵萬疊化爲金粟憾千堆可品爲范黃葉矣予題卷端愈多愈
覺思清新多許難爲少許珍爲報崔王兩黃葉而今范叟第三
人

朱布衣克緒字筠橋居沈家市寄然鬚草來質過人隱居云石

罅流泉花引客松陰覓路鳥窺人句頗超妙

邵女士淵潤字君琬匏風孝廉廣融女詠西施云巧笑能教敵
萬兵美人自古號傾城不勞匕首吳成沼壯士慚歌變徵聲題
管仲姬畫竹云清風林下合同論唱和餘情染墨痕寫出琅玕
青節勁似將筆諫趙王孫讀書得閒閨閣所難

海虞詩話卷十六

單學傳師白輯

曾副貢彬文字仲才道光五年鄉試副榜資敏學勤詩亦英秀
鴈聲云未覩書空字迹留數聲嘹亮過庚郵和將柔艣音偏遠
併入寒砧韻更幽十二樓中明月夜三千里外洞庭秋劇憐孤
館先聞者悵觸長途一段愁又有傲骨由來是病根及文章半
爲俗情牽之句是可知其懷抱矣

曾上舍鎔文字小舫號野岑性喜書畫嘗裝冊數百葉徧索時
賢手蹟以供賞玩道光癸未其父雲舫大令豫謙知盧龍縣是
秋省親官舍有紀行詩一卷茲錄二首繁華從古說揚州南部

煙花十二樓一棹蕪城門外過聽風聽雨不勝秋茅店雞聲曙
色催輪轅馳逐似聞雷昨朝行盡江南路十丈紅塵撲面來
佻公子行彼周行誰知其爲詩人乎

陸布衣潛字靜香蔚林解元仁虎猶子有橫雲山館小草自述
云蓬門守拙敢鳴高豐滿常思待羽毛好勝曾辭原憲粟初貧
猶恥仲由袍癡心未減還縈夢精力將衰漸憚勞一事年來最
惆悵課書不暇到兒曹餘如離情總在閒中覺歡緒都從過後
知入夢偏無蕉下鹿消魂惟有雨中花門無吏擾因田盡家有
書傳待子生拘禮恰如新嫁女持躬差比出家僧性如耽寂原
非福句到求工或致窮又鐘聲帶月度花梢皆妙

秦大令爾馨號板橋久仕閩中爲人謹飭道光乙酉自閩赴京
途中作云綺堂幾度醉離筵遙指京華路六千帆挂正當山雨
後香燒直繞水雲邊急灘過遠心猶怯舊友情多夢亦牽換得
頭銜遲祿養鬢絲惆悵愧前賢

錢副貢敦禮字南香道光八年順天鄉試副榜送夏叔堅之山
左云欲別偏難別河梁話更長相逢有知己異地卽同鄉文思
江山助才鋒閱歷藏跳鱗如有便尺素好頻將又雞肋嗟書味
蠶叢畏世途亦佳

李文學卿華原名杜才字蘭齋工八分書賦永叔讀書云萬籟
知何處書聲併作秋風高千樹響窗小一燈幽蕭瑟悲無際淒

涼意孰酬嗤他修史者紅袖兩行留

張上舍蓉鏡字芙川蕘友觀察文孫也少年喜購書籍多與賢
士大夫交讀吳竹橋先生湖田樂府云故鄉好景足流連細譜
新詞解組年文采風流今歇絕空看煙雨小湖田其配姚早卒
因爲悼海棠云留春乏術苦尋思春欲留時情更癡薄醉易醒
風雨怯無香微度夢魂疑蝶飛猶向花邊繞鶯語偏宜葉底遲
瞥眼繁華何處覓拾來殘片認芳姿又空留一線情難忘縱有
餘芳恨獨知又逝水難回情共遠飛花無著夢都寒正如桓子
野聞歌輒喚奈何也弟藻撲字季文一字平皋年未冠嗜詩
周布衣炳字峻德號蟬仙居福山詠楊妃云占盡昭陽殿裏春

果然色冠六宮人馬嵬坡上心應悔未君恩讓采蘋

蘇文學景韓字德卿少年詩多放曠語讀書雜詠云標列牙籤
勝五車曉窗旭日涼紅初下帷靜坐心懷暢願讀人間未有書
庭外風聲雜雨聲齋居意愜是幽清研朱滴露尋常事便是人
間不世情攤書獨對樂何窮靜引松香一徑風莫謂書生無幹
濟欲耕天下硯田中業在名山萬卷餘詩書能用卽華胥雖然
趙普欺人語也是人間善讀書

屈文學允升字雲齋以吟香山房小草來質詠絡緯有織盡古
來秋述感有無求轉易得人親句俱佳

陳布衣光鉅字青巖好遊恆在浙江金涇待渡云人來古渡月

初上潮落寒塘舟未開是宋人得意語中秋辭云越羅衫色白
如霜執扇輕搖稱晚妝茉莉珠蘭都過了木樨毬子作香囊又
遊西山塘有山當花缺堆青髻句亦佳

毛布衣俊字子千詩人毛琛之姪章句敏捷兼工書畫贈范引
泉云處囊君已知毛遂讀畫吾能識范寬詠李白云千古服膺
惟謝朓一生知已有汪倫

倪生士麟字心江對月云故園一片月偏向客中看遙想慈幃
夜時憐遊子寒他鄉居日久無事慰親歡對影縈懷切渾忘刻
漏殘語頗真切

陳上舍琳字樹年有競陰詩草送朱楚垣歸洞庭云林屋洞深

杳探書不可行儻君過角里爲我弔先生皓月中秋路長杯獨
客情鼓篷三萬頃笑語及天明泛舟云泛舟時雨過新綠曳春
衣江勢漲猶動山光晴欲飛閒花明鷺渚亂竹隱漁磯時看魚
離網悠然悟世機餘如山遊云眼曠山爲小身高天自低雪泛
云風雄吹水立寒隋通天明秋夜云夢蘇傾雨竹心怯落風花
顧山大樹云滄海收濤氣寒空暗日光風格語意皆極穩健

言吏目尙熾字依山號竹樵皋雲太守長子臨雍以賢裔陪祀
賞職平居手不釋卷嗜詩酒著傳奇樂府予見其家居雜詠用
恕醉軒韻十二章殊清妙特錄二章讀書云羲皇讀洛書太始
已聞之祖龍滅不得名言茲在茲後來文事盛經史又補遺近

時科舉學與之路分歧賤子雖恬退陳編喜手持如與古人語
朝夕相攀追三餘猶未足十載無停披卽爲下酒物大醉不爾
疵學琴云學劍力不强學文語不綺莫如養性情含宮復泛徵
吾家武城公治化出十指割雞用牛刀前言戲之耳此調盛天
池彈者今罕矣欲攜三尺桐先領一具理美人良夜來曠士清
晨起竟忘絃有無得意聽流水

徐布衣攀桂字月霄有銀杏草堂稿詩多豔體新柳一絕極超
脫云閒來步履小橋西處處鶯聲柳葉齊忽憶故人同躍馬曉
風殘月過蘇隄訪吳竹堂題壁云四月黃鸝不住嚙槿花滿地
夕陽西門前孤艇無人管渡盡雛猿過小溪

許布衣乃昌字雪梅閒居云花徑有詩能侑酒草堂無佛也焚香

顧處士椿年字沅蘭著悟香仙館詩過靈巖山館弔畢制府沅云空說菟裘築歸休願竟違靈巖終古秀遼鶴幾時歸樹老花仍放庭閒鳥自飛池臺原似昔惆悵主人非

國易縣姓

梅花月次韻

云飛來素魄換斜陽句引師雄入夢鄉清淺忽生庭下水朦朧祇道鏡中香寒輝瘦斂空山寂疏影淒添曲徑荒最是花魂能耐冷夜深玉立更擎霜又贈查鐵山少府云煙霞供養江村富翰墨風流吏隱多城西春遊云四望有山皆入畫一春無日不尋詩蕩槳船搖春水碧倚樓人醉夕陽紅立夏日山齋餞別云

詩似好山尋愈出春如佳客去難留皆丰神清朗如其爲人
王文學湘字香溪孤貧喜風雅玉峯寓舍得曾大父柳南續筆
誌喜云此是先人筆瑩鈔雪纂餘卻從今日見幸獲我家書啓
帙消芸蠹挑燈校魯魚歸裝欣載寶轉惹淚漣如此東澌曾孫
與王吟濤大令湘同姓名

孫布衣燧字耕吾號夢餘哭方凝如云客中對影不勝孤每憶
高陽舊酒徒方擬還鄉杯共泛那知展墓草先枯敬通室是生
前累伯道兒兼死後無痛極轉思君是福災年恰免癸庚呼又
得時人自投時好涉世吾偏與世違縱卜他生還有我已教今
世不如人而萬想輸人隨飽滅則本蘇詩一飽萬想滅也蓋貧

而出遊無所遇歸值年饑詩故酸楚乃爾

宗文學晉字麗生未弱冠才思俊逸虞山秋眺云浩歌登虞山
雨意恰初醒縱目翠微巔浮雲忽飛盡風高海有聲日澹湖無
影并作乾坤秋潏潏接西嶺天空地闊中獨立孤峯頂伫月云
未知明月光已透梧桐頂偶然仰碧空不見銀河影夏夜獨坐
云銀河如浮煙流影不到地仰見星搖搖虛空有風意由小維
摩寺登拂水巖探雲栖石屋云白雲招我遊西山遙遙待我蒼
松間松間一角紅牆見忽被白雲遮不見振衣且向雲中來小
維摩寺開未開入門先與老僧語可識雲栖在何處老僧爲指
蒼崖東石雲玲瓏起其中我道去此祇一間豈知尙隔重重澗

一條飛瀑來層霄蜿蜒送我過石橋拂水巖高不可度白雲飛
來導前路我隨白雲迤邐行行又有雲相迎信步惟將白雲
逐不知身入雲栖屋詩才未可量天限其年惜哉

范布衣錫章字禹成一字凝度居釣渚爲人簡質通醫卜星相
諸家術累於貧言多愁苦如偶成云愁濃嫌酒薄心亂厭花繁
村居云幽鳥不停語野花多異香白桃花云願以素姿稱靜女
羞將濃豔引仙郎舟中云帆穿綠樹憐櫓短船過青山囑櫓遲
皆具雅人深致有小村詩草

平處士豫字子遷客中云客裏隆冬逼茫茫百感侵遇艱諳世
味交久識人心多病名難就長貧學不深周郎今已往顧曲少

知音

范布衣璣初名琛字引泉祖居釣渚徙南城市中君又徙太平
橋南靜僻境也鬻畫養母山水倣石谷而專意在漁山鑒賞書
畫亦擅超解詩有畫中來稿寓言云幽花媚紅粧珍禽敲翠羽
盈盈樓上愁皎皎懷春女良會渺難逢佳時多風雨香氣滿曲
房和光凝繡戶青鏡寂無言朱顏暗消與題柳隄逸興圖云絲
絲楊柳罩孤亭荻筍蘆芽滿碧汀閒策一筇新雨後奚囊收盡
衆山青僦居南郭迴隔市囂而靜裏聲聞皆成天籟得疊韻詩
云綠槐樹隙聳危楹六月樓頭暑不生連夕颼颼撼窗牖心旌
搖蕩聽風聲納涼場角坐深更稼穡鄰翁話豆棚真是幽風圖

內意月明猶動桔槔聲閒庭寂寞草敷榮綠映疏簾午氣清不
許無端誅翦盡夜來留與聚蟲聲十年辛苦爲謀生廢卻當時
鑿壁情逝水韶華消壯志隔鄰猶喜讀書聲大地炎埃僻地清
索居意豈在逃名鷗朋鷺侶時相逐茶熟剛聞剝啄聲蓋其南
鄰爲吳弋雲亦工山水北鄰爲姚墨齋染花鳥相與討論六法
晨夕無閒詣力未可限也

吳布衣熙原名履中字弋雲與范引泉程禮門同學山水於瞿
翠巖尤相善也性溫靜能書兼能詩秋夜偶成云秋聲硯北過
秋思託毫穎庭前明月光照見幽人影梧葉韻涼颼籬花色妍
靚懷古憶廬陵悠然悟詩境歲寒三友圖云蒼松瘦梅共修竹

三友調高同一曲紛紛凡木拜下風落落英姿俱絕俗君不見
三春桃柳各爭妍三友空山甘隱伏此殆自比與范程交耳書
感云習俗相交越視秦誰能晚節勵松筠學兼謀食難言學貧
不工詩亦負貧有技徒令供嚇鼠無才何事足驚人正應隨分
泥塗裏一卷陶詩悟我真

時文學堦字容齋工詩善書如雲影半開天露碧霞光斜映水
流紅綠蠟三杯邀月飲黑甜一枕伴花眠俱佳

楊畫師森字雲谷居小步道巷口繪事外兼精岐黃術嫻歌曲
能詩江干月夜云潮落江干夜氣澄扶疏野岸挂寒藤西風吹
墮蘆花月寂寞漁磯一點燈題畫云漠漠空山雨乍晴溼煙壓

樹暗還明溪頭有箇垂竿老坐聽西風落葉聲又星移野岸穿
高樹燈出孤村見短牆

周布衣鏡字心蓉詩致清雋初夏雨中有感云蕭齋日永篆煙
消賦罷湘靈倚北寮好夢欲隨蝴蝶去隔簾驟雨打芭蕉

王文學朝忠字蘊香一字夢霞蘇州洞庭山人寓吾邑南郭書
學右軍目力纖瞭能於一粒胡麻書絕句二十字詩亦清麗幽
居云對山小閣稱幽栖波蕩湘簾窳地齊三徑亂紅蝴蝶舞一
天濃綠鶉鴝曉筵招歡伯呼兒促棋讓佳人下子低韻事日長
添幾倍未嫌春盡畫樓西紅梅云玉質方宜豔色施北人笑認
杏花枝清華偏守冰霜節寒素休矜雪月姿和靖看來渚鶴頂

壽陽妝罷亂燕脂萬紅得此成冠冕莫道瑤宮醉酒卮

姚女士晚眞字芙初張芙川上舍室詩多幽思苦韻年亦因以
不永送芙川省試云安排行李檢書籤傍曉行旌拂桂蟾歸日
非遙堪指屈離愁何事上眉尖酒懷易縱賓朋聚秋暑休衝道
路炎山到金陵青不到封書莫忘好詩兼病危云奈此纏綿未
盡思試提斑管腕難支詩多惡識防眞應病到沈疴莫問醫綺
閣鏡安花四照紅綃帶緩袖低垂雙棲梁燕雙飛蝶預恐檀奴
易惹悲餘如春草云東風最先覺南浦渺相思玫瑰花云色嬌
何惡紫客醉願分香皆極意錐鍊

張女士毓珍字佩生漱石義女也趙烈婦詩云茅舍空牀血淚

枯還防花片落泥汙而今青鳥休窺探泉下羅敷自有夫撒手
崇朝大義明蓋棺應有笑顏生重他羅帶剛三尺繫住千秋節
烈名

桑女士素清字竺漪上舍葆儒女錢秋槎學博之繼配著有明
靚山樓詩鈔筆致清麗遊小石洞觀露珠泉云點滴一泓水幽
幽清我心倒涵雲影碧時有露珠沈石室無春夏蓮臺自古今
空山杳人迹回首暮煙深初夏遣懷云暖氣熏人又麥秋一簾
新雨趁雲收詩懷久已忘春去病况偏宜與佛謀錢向蓮塘青
乍選鍼看秋水綠齊抽廿年回首東湖路愛聽農歌繞畫樓蓋
其家在湖濱之橫涇故思之也又柳影云驛路斜陽無定處谿

橋新月乍升時寄懷鮑尊古表姊云自埽殘紅聊撥悶爲題新
緣互傳詩

季女士蘭韞字湘娟著有楚畹閣集病起隨親赴黃岡道中遇

雨

時方
發旱

云力疾出門去長途曉夜行親緣民事重我覺此身輕

月黑風逾急雲低雨驟傾衝泥心自喜膏澤沛蒼生過岳陽樓
云木落秋江上野航猿嘯鴈唳總悲涼片帆風裏遙相認煙雨
孤樓是岳陽

宗女士婉字婉生號夢湘明經德潤女蕭大勳之配也與二弟
論詩有感云不論聰明不論癡莫談文字莫談詩縱饒脫盡香
匳氣終被人憐是女兒

吳女士康承字素晚竹橋禮部女孫邁堂司馬次女李汝明配
也靈巖山懷古云爲訪西施迹靈山緩步躋屨廊人寂寂香徑
草萋萋行撥煙蘿裊吟驚鳥雀栖去來今一瞬愁絕子規啼春
日偶成云一桁簾垂傍水廬筆牀茶竈俗塵除爲吟佳日多披
帙因悔雛年少讀書池草綠添微雨後瓶花香挹暖風餘春游
屢負看山約贏得鄰娃笑索居

海虞詩話後序

自來說詩者多矣要必能闡格律之精始可與言宗派之別吾
虞二馮先生之評才調集推爲正宗蓋非珍其綺麗而特貽其
典則者也虞山詩派於是乎尊果能鑄金呼佛則必神悟風騷
妙參比興而不離其宗漁洋與秋谷齟齬而訾訾之可盡信乎
二馮之後吾虞以詩鳴者不一人嘉慶迄道光初厥有釣渚單
師白先生詩名高一邑著作等身瑣瑣叢積逾二百卷不幸飢
驅旅卒逮孫而無傳良可傷矣海虞詩話手稿十六卷未成之
書也歲月遞嬗故紙僅存陵谷變遷風雅日替鄺亭龐先生以
開府清新之才得萬里江山之助詩律特細上接正宗大懼文

獻之不足冀發潛德之幽光訪求得此手稿並舊鈔本於俞氏藏書家持以示不佞誣諉以校勘之役披覽積日知其意在補詩苑之遺因人及詩卽藉詩存人舉凡袞袞諸公粲粲大集皆在所略一遵柳南之例緣是強半爲牢騷嗚咽之音卷端自記有向來所見鈔寫不勤特訂此冊陸續登輯之語故其爲書年輩無次後先重出塗乙縱橫朱墨點竄文孫銘玉爲之證諸志記別其時代鈔錄成卷部居粗立計自順康以迄嘉道邑人流寓方外閨閣幾四百人姓名里閭行事遺章燦然羅列但未參互考訂不免歧之又歧龐先生則曰此雖詩苑之支屬實居邑志之附庸必較正流傳俾無湮沒始意甚盛夫知其人論其世

孟子教人誦讀之方也後世詩人若陶之賞奇析疑杜之殘膏
賸馥韓之纂言記事旁搜遠紹究其旨趣無不歸本孟子誦讀
之教鄉曲儒流窮愁著書日營掌錄顧勤懇於表揚前哲昭示
來茲是奉教於孟子而陶杜韓之所爲罔弗爲可任其蠹食煙
消而不求傳之永永哉勉竭管蠡檢覈草稿割正疏舛重鈔一
通以俟方聞之衡鑒修飾潤色印本傳播庶幾師白先生守先
待後之功得龐先生而益彰而且虞山詩派導源於二馮者有
人焉以之論定是編信乎派衍無窮直與虞山並壽矣時維尙
章赤奮若如月之朔邑後學張守誠意溟甫識

海虞詩話跋

單師白先生爲 先高伯祖秋溪公壻與 先曾祖子唯公莫

逆交撰述甚富逮 永遊單抱樸師之門見師嘗手一編作蠅頭

狂草曰此叔祖師白公海虞詩話手稿也歲甲寅 永既集資校

印抱樸齋詩稿復思從師門求所謂海虞詩話而讀之而稿本

三冊與師白先生所著鈞渚詩鈔五冊已爲鄺亭龐先生所物

色且與息齋邵先生意溟張先生竭三載之力讎校精覈籌資

擬刊 永卽糾合同志集金若干張先生命董其成蓋此書前二

十年抱樸師將鐫版流傳而未迄今幸獲龐先生手定本得竟

先師未竟之志此 永所以謹受張先生之命而不敢辭者也茲

印成詩話十六卷鈞渚詩選一卷因謹述顛末如此乙卯季夏

後學翁永孫忍華氏謹跋